

671.1267
084
12

大城縣志

卷之二

建置志

城池 廨署 學校 書院
壇壝 倉庾 祠廟 坊表
街市 郵政 津梁 里社
村莊

卷之三

食貨志

地畝 賦役 起運
存支 戶口 鹽法
物產 蠲賑

大城縣志卷之二

上元趙炳文重修

吳縣徐國楨鑑定

建置志

古者建邦設都皆爲民而立也非城池無以衛民非
廨署無以治民非學校無以教民非武廟無以型民
非壇壝無以爲民祈福非倉庾無以爲民賑饑非驛
傳無以爲民達隱至街衢民之所遊處也坊表民之
所矜式也里社民之所生聚也津梁民之所利濟也
郵政民之生養死葬也凡此皆平舒一邑之大局故

次志之

城池

前代開創築濬莫得而考明初惟有舊址正德七年縣公石名恩卽址築土城雉堞悉具嘉靖辛酉縣公余名尙貢用磚砌西北二面添修南門甕城丙寅縣公張名應武用磚砌東南二面建角樓四座西南門樓二座隆慶戊辰縣公趙名德建東北門樓二座城四圍四里一十三步高一丈六尺基闊一丈五尺顛闊八尺雉堞一千零九十餘四門題額東曰通和西曰安阜南曰明遠北曰恩光池環四里五十三步廣六丈深七步崇禎六年

縣公毛雲翰添築城牆增土六尺十年添修東北門甕城二座外濬池一層舊池深闊亦加倍焉

國朝順治九年河水泛漲各處堤岸盡決水至城下三面受浸止存東面城牆倒壞百十餘丈知縣馬公騰陞諭紳衿百姓捐資修築不派鄉夫專用街民貧者給之工食以身倡率躬親納榷號令嚴而不擾晝夜寢食城頭不避拮据二月餘而工竣既堅且好民不苦費胥不爲奸公又重建東南城樓爲閣上塑奎宿爲一邑文明之兆後歷百年頽爲平地乾隆十年知縣請帑營築久復傾圯咸豐年間疊奉修葺之令俱以繁費而止

同治六年梟匪滋事縣境逼近賊氛知縣彭瑞麒督率
紳民捐集銀一萬三千餘兩按舊城基址修建並挑濬
護城濠一律深通

縣治

縣治當城之中前代建立無考明洪武元年主簿周自
銘創置成化三年知縣唐鏞重建正德九年知縣石恩
重修嘉靖四十年知縣余尙貢葺修隆慶三年知縣趙
德光撤舊爲新萬厯十一年知縣狄同燧修

國朝乾隆三十七年知縣張道光十五年知縣何志

清二十年知縣陳炳常二十三年署知縣李方儀同治

元年知縣彭瑞麒均重修

正廳三楹

扁曰懸鏡堂

公帑四間

在堂後左右

幕廳三楹

在堂西扁曰贊治久廢

時辰樓一座

在露臺西

吏戶禮三房并架閣房七間

在堂東

兵刑工三房并馬科承發鋪長司房九間

在堂西

戒石亭

在甬道中銘云爾俸爾祿民膏民脂下民易虐上蒼難欺此始於蜀孟景頌箴諸屬宋太宗摘

其要者頌之郡縣明因之

儀門三間

中爲門東豎修城碑西豎清丈田糧碑

東西角門二座

東西守門役房二間

獄神廟一間獄房七間

在西角門內西隅

土地祠一間

在迎賓館東

迎賓館三間

在土地祠西

大門三楹

原有譙樓扁曰京兆首邑萬厯年縣令梁公綱改造大門將鐘移懸北城樓上

榜棚二厦

在大門外東西

申明亭一間

在大門外東基址猶存

後堂三間

在懸鏡堂後扁曰退思堂

左翼室二間

右翼室二間

俱知縣李知春建

廚房二間

東廂房二間

西廂房二間

書房一間

燕室三間

偕春亭

自廚至亭皆廢

知縣宅門

在退思堂北

儀門房三楹

扁曰瘦槐齋

正廳三間

書房三間

在正廳東扁曰循絃堂

廂房四間

在正廳西

正寢室五間

東西廂房各二間

穿廳一間

在寢室後知縣李知春建

正室三間

今止一間

愛蓮亭

在寢室東

主簿衙

由西馬道入

儀門一座

扁曰督糧公署

正廳三間

扁曰履正奉公

東西廂房各二間

小房一間

在正廳後東

書房一間

在正廳後西

寢室三間

後房三間

萬曆十一年知縣狄同燿重修順治年裁汰主簿

典史衙

由東馬道入

儀門一座

正廳四間

今止二間

西廂房一間

後堂三間

左右廂房各一間

萬厯十年知縣李知春創建

寢室三間

左右廂房各三間

萬厯十一年知縣狄同燧建

察院

在縣治東今圯

正廳三間

舊左右有翼室廳規模狹淺不足以容使節萬厯十年知縣狄同燧乃撤去左右翼室就

中三楹擴而廣之
扁曰振揚風紀

東西廂房各三間

穿廳二間

在正廳後知縣李知春建

寢堂三間

退室一間

在寢堂後知縣狄同燧建

書吏房三間

在穿廳東

廚房三間

在穿堂西

儀門一座

東西角門二座

大門一間

外有官廳三間

在大門東

儀門一座

西廂房一間

分司在縣治南年久傾圮

國朝順治八年因添設大城營苦無公署縣令馬公騰陞

改作公署

正廳三間

廂房

東二間西三間

退廳一間

在正廳西

寢室三間

在正廳西

廚房三間

在寢室西

儀門一座

東西角門二

大門一座

儒學公署

教諭宅

在儒學大門內東

正廳三間

寢室三間

東廂房三間

西廂房三間

儀門一座

前房三間

住門役者

訓導宅

在教諭宅西

正廳三間

寢室三間

東廂房三間

西廂房三間

儀門一座

前房三間

住門役者

射圃亭

在儒學西基址猶存

社學

社學

舊在儒學西基址猶存仍有教讀十名以訓在城在鄉之子弟今廢

陰陽學

醫學

醫學

俱在縣治南因大城營公署地基隘小知縣馬騰陞改作營房

僧會司

僧會司

在縣治西北觀音寺後正房五間東廂房三間儀門一座歲久頽壞西廂房二間俱已傾廢知

縣狄同燿重修習儀於茲

學校

學宮在縣治西金天會十二年邑令姚璧建元至正二十三年達魯花赤楊公甫重建元末兵毀明洪武間縣丞王巒重建成化二十年知縣閻茂修宏治三年知縣張津重修增建講堂光風霽月亭及齋舍數十楹年久傾圯正德十年知縣石恩承繡使董建中命重修增建齋舍八連扁曰文行忠信詩書禮樂嘉靖四十四年知縣張應武重修

國朝順治十七年縣令徐公伸重修康熙二十五年教諭黃華蕃修後增修者碑石剝泐無可徵考道光十六年知縣何志清重修至同治十二年牆宇傾圯知縣莊允

端教諭唐文智督率紳民捐貲重修光緒二十三年知縣趙炳文重修

御製訓飭士子文

國家建立學校原以興行教化作育人材典至渥也朕臨御以來隆師重儒加意庠序近復慎簡學使釐剔弊端務期風教修明賢材蔚起庶幾棧樸作人之意乃比年士習未端儒教罕著雖由內外臣工奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品次及文章學術事功原委有敘爾諸生幼聞庭訓長列宮牆

朝夕誦讀甯無講究必也躬修實踐砥礪廉隅敦孝順
以事親秉忠正以立志窮經考業勿雜荒誕之談取友
親師悉化驕盈之氣文章歸於醇雅毋事浮華軌度式
於規繩最防蕩佚子衿佻達自昔所譏苟行止有虧雖
讀書何益若夫宅心勿淑行已多愆或蜚語流言脇制
官長或隱糧包訟出入公門或唆撥姦猾欺孤凌寡或
招呼朋類結社邀盟乃如之人名教不容鄉黨切齒縱
倖脫褫扑濫竊章縫返之於衷甯無愧乎况鄉會科名
爲掄才大典關係尤重士子果有實學何患困不逢年
顧乃標榜虛名暗通聲氣夤緣詭遇罔顧身家又或改

竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若厥初拜獻便已作姦犯科則異日敗檢踰閑何所不至又安望其秉公持正爲國家宣猷樹績應後先疏附之選哉朕用嘉惠爾等故不禁反復惓惓茲訓言頒到爾等務期共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志甯俟他求哉若等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國外而直省鄉校凡學